



Band 1. Von der Reformation bis zum Dreiigjhrigen Krieg 1500-1648

Eine mutige Frau stiehlt die knigliche Krone – Helene Kottannerin (ca. 1400-nach 1458)

Helene Kottannerin (ca. 1400-nach 1458) war vermutlich die erste Frau, die einen auf Deutsch geschriebenen, erhaltenen, autobiographischen Bericht verfasste. Sie wurde in denburg (ungarisch: Sopron) als Mitglied des niederen Adels geboren. 1431 heiratete sie Johann Kottanner aus Wien. Man vermutet, dass sie sich im Jahr 1436 am Hof Alberts II. von Habsburg, des rmischen Knigs (und Wahlkaisers) (reg. 1438-39) und Knigs von Ungarn (reg. 1437-39), aufhielt. Helene Kottannerin befand sich dort im Dienst der Knigin Elisabeth (ca. 1409-42). Im Jahr 1439 zog Albert mit seinem Hofstaat nach Ungarn, wo er nach sechs Monaten am 27. Oktober 1439 verstarb. Elisabeth war zu diesem Zeitpunkt im fnften Monat schwanger, weshalb sie sich weigerte, auf Drngen einflussreicher Adliger den sechzehnjhrigen polnischen Knig Wladislaus III (1424-44) zu heiraten, da sie ihre Hoffnungen auf ihr ungeborenes Kind setzte, welches ihrem Leibarzt zufolge ein Junge sein sollte. Um dessen Recht auf die Thronfolge zu sichern, musste der Sohn der Knigin sobald wie mglich gekrnt werden. Sie beauftragte daher Helene Kottannerin, in die knigliche Festung Plintenburg (ungarisch: Visegrd) einzubrechen und die schwer bewachte Stephanskrone zu stehlen. Helene willigte ein und fhrte am 20. Februar 1440 gemeinsam mit einem ungarischen Adligen ihren verwegenen Diebstahl aus, der im ersten Textauszug unten beschrieben wird. Am folgenden Tag machte sich Helene auf eine beschwerliche Winterreise zu Elisabeths Schloss Kormon, wo sie die Krone an die Knigin auslieferte. Nur wenige Stunden nach ihrer Ankunft wurde der Sohn der Knigin, der als Ladislaus (ungarisch: Lszl) Postumus bekannt wurde, geboren.

Der zweite Textauszug beschreibt das zweite Schlsselereignis in der Erzhlung Helene Kottannerins. Elisabeth und Helene machen sich mit dem zuknftigen Knig und der Knigskrone im Gepck nach Stuhlweissenburg (ungarisch: Szkesfehrvr), dem Krnungsort der ungarischen Knige, auf. Am 15. Mai 1440, dem Pfingstfeiertag, hob dort der Erzbischof von Gran den drei Monate alten Ladislaus aus seiner Wiege und krnte ihn zum Knig. Somit sicherte Elisabeth mithilfe von Helene die Thronfolge fr ihren Sohn, der, obwohl er als Knig anerkannt wurde, letztlich bis zu seinem Tod 1457 nur vier Jahre lang regierte.

[. . .]

Do n die recht zeit kam, an der got der almechtig seine wunderwerch wrchen wolt, da schickhat vns got ainen man, Der sich willigat her aus gewnnen die Heiligen kron, vnd der was ain Vnger vnd was genant der . . . , vnd der gieng treulich, weislich vnd mndlich mit den sachen vmb, vnd richttaten z, was wir bedorften zu den sachen, Vnd nomen ettliche Slos vnd zwei feil. Der mit mir wagen wolt sein leben, der legt an ainen swarczen samedeinen pett rokch vnd zwei vilczschuech, vnd in yeden schuech stekchat er ain feil, vnd die Slos nam er vnder

den rokch. Vnd ich nam meiner gnedigen frawn klains Sigel, vnd ich het dy slüssel zu der vordern tüer, der warn dreÿ, wann bey dem angel was auch ain keten vnd ain nërib, do het wir auch ain slos angeslagen, ee daz wir naher zugen, auf den sin, daz nÿmant anders ain slos da hin möcht geslahen, vnd do wir nu bereit wuerden, Do sandt meiner fraun gnad ainen poten ains vor an hin auf die Plintpurg, vnd tat dem purkgrafen vnd hern Francz von Pöker vnd Weitvilassla, die dÿe Junkchfraun die weil Inn heten, zu wissen, Daz si sich dar nach solten richten, wann der wagen këm, daz Si bereit wëren zu faren gen Gumaren zu iren gnaden, wann Si hiet müt her auf gen Prespurgk, vnd das het man allem lërm Hofgesind angesagt. Do nü der wagen bereit was, den man nach den Junkchfraun solt schikchen, vnd der Sliten, darauf ich faren solt, Vnd auch der mit mir stünd in den sargen, Da schuef man vns zwen Vngrisch herren zue, die mit mir nach den Junkchfraun solten reiten. Wir fuern nü dahin.

Do kamen dem purkgrafen die mër, wie daz ich këm nach den Junkchfrawn. Des ward in vnd ander meiner frawn Hofgesind vast wunderen, daz man mich als verr aus liesz von meiner Jungen frawn, Wann Si noch Jung was, Vnd lies mich nicht gern von ir, das westen Si all wol. Nu war der purkchgraue ain wenig krankch vnd het willen gehabt, er wolt sich zu der tür gelegt haben, da der erst ingank was zu der Heiligen kron. Da ward sich sein krankchait meren, als dann got haben wolt, vnd er torst dÿ knecht nicht da Hin legen, dar umb, daz es in dem frawnczimer was. Vnd legat ein leinein tüehel vmb das slos, das wir bei dem angel heten angeslagen, vnd ain petschad dar auf.

Do wir nü komen auf die Plintenpurg, die Junkchfrawn waren froleich, daz Sy zu meiner frawn gnaden solten faren, vnd richtaten sich zue vnd liessen ain truhen machen zu irm gwant. Da muest man lang mit vmb gen vnd klokchten vncz in die achtet [*sic!*] stund. Vnd der mit mir was, der kam auch in das frawn Zÿmer vnd traib sein kurzweil mit Junkchfraun. Nü lag ain wenig holcz vor dem ofen, da mit man In solt haiczen. Da parig er die feil vnder. Nu heten die knecht, die *den* Junkchfrawn dienten, Das ersehen vnder dem holcz vnd wuerden mit einander rawnen, Das erhört ich vnd sagt im das zu hant. Do erschrakcht er als hart, daz er die varib verkerat vnd nam sÿ da wider naher vnd parig sie anderswohin.

Vnd sprach zu mir: „fraw, besecht, daz wir Liecht haben“. Vnd ich pat ain alte frawn, daz si mir ettlich kerczen gëb, Wenn ich vil zu petten hiet, wann es was an ainem Sambstag [20. Feber 1440] snachts, vnd was der nagst Sambstag nach aller mann faschang tag. Vnd nam die kerczen vnd parig die am weg. Vnd do nü die Junkchfraun vnd ÿeder man slaffen was, Do belaib ich in der klain stuben vnd ain alte fraw, Die ich mit mir gefürt het, die kund ain wart nicht Deÿtsch vnd west auch vmb die sachen nicht, vnd het auch des Hawss kuntschaft nicht, vnd lag da vnd slief vast.

Da sein nü zeit was, Da kam, der do mit mir was in den nöten, durch die kapellen an die tüer vnd klokchat an. Do tet ich im auf vnd slos nach im wider Züe. Nü het er ainen knecht mit Im genomen, der im helfen salt, der was mit taufnam genant gleich als er, der . . . , der het im gesworen, vnd ich ge da hin vnd wil im dy kerczn bringen, do waren sew verloren. Do erkam ich also hart, daz ich nicht wessat, was ich tuen solt, vnd wër die sach schier gesaumbt warden

allain von des liechts wegen. Da bedacht ich mich vnd gieng vnd wekchat die frawn haimleich auf, die mir die kerczen het geben, vnd sagt ir, die kerczen wëren verloren, vnd ich hiet nach vil zepetten. Do gab si mir ander, da was ich fra vnd gab im die, vnd gab im auch die Slos, die man wider an solt slahen, vnd gab im auch meiner gnedigen fraun klains sigel, da mit man wider zu solt sigelen, vnd gab im auch die drey slüssel, die zu der voderen tüer gehorten.

Do nam er das tuech mit dem petschad ab dem slos, daz der purkgraue dar auf het gelegt, vnd sperrat auf vnd gieng hin In mit seinem dienër vnd *arbaitat* vast an den andern slossen, daz das slahen vnd feillen überlaut was, vnd waren die wachter vnd des purkgrafen volkch diselbig nacht gar münter von der sarig wegen, die sy dar auf heten, dennoch het got der almöchtig Ir aller oren verschopt, daz sein ir kainer nicht horat. Dann ich horat es alles wol, vnd ich was die weil in der huet mit grossen angsten vnd sorgen, vnd ich knÿat nider mit grasser andacht vnd pat hincz got vnd hincz vnser lieben fraun, daz Si mir vnd meinen helfëren bei gestünden. Doch het ich grosser sarg vmb mein sel dann vmb mein leben Vnd pat hincz got, ob das wër, daz es wider got wër, daz ich solt darumb verdampft werden, oder daz ain val dar aus solt gen lant vnd lewten, daz dann got meiner sel gnedig wër vnd liesz mich ee alhie sterben.

Da ich also pat, do kam ain grosser ludem vnd gerümpfel, als vil mit harnasch an der tuer wëren, Da ich den het eingelassen, der mein helfer was, vnd mich bedeücht, wie sy dÿ tür wol aufstossen. Da erkam ich gar hart vnd hueb mich auf vnd wolt die gewarmbt haben, daz Sÿ von der arbeit liessen. Do kam mir in den sin, ich solt an dÿ tüer gen, vnd das tet ich. Do ich an die tuer kam, do was das gerümpfel da hin vnd hort nÿmant mer. Do gedacht ich mir wol, es wër ain gespenst, vnd gie wider an mein gepet, vnd verhies vnser lieben fraun ain fart gen Zell mit parfuessen fuessen, vnd die weil ich die fart nicht laistet, die weil wolt ich an der Sambstag nacht nicht auf vedern ligen, vnd sprich auch all Sambstag nacht, die weil ich leb, vnser lieben fraun ain besunder gepet Vnd dankkch iren gnaden, die Si mit mir getan hat. Vnd ich bit Si, daz Si iren *sun*, vnsern lieben Herren Jhesum Cristum fur mich dankch der grossen gnaden, die mir sein parmung also scheinperlich getan hat.

Vnd da ich nach an meinem gepet was, da deücht mich aber wie ain grosz geprecht vnd ain gerumpfel mit Harnasch an der tür wër, da der recht eingankch was in das frawn Zÿmer. Do erschrakcht ich als hart, daz ich vor angsten alle zitern vnd swiczen ward, vnd gedacht, es wër nicht ain gespenst, vnd die weil ich an der kapellen tur gestanden wër, die weil wëren Si her vmb gegangen vnd wessat nicht, was ich tÿen solt vnd losat, ob ich die Junkchfraun icht da hort. Do hort ich nÿmant. Do gie ich gemëhleich an dem stieglein abher durch der Junkchfraun kamer an die tuer, do der recht ingankch was in das frauen Zimer. Do ich an dÿ tuer kam, do hort ich nÿmant. Do was ich fra vnd dankcht got, vnd gie wider an mein gepet vnd gedacht mir wol, daz es der tewfel wër vnd die sach gern vnderstanden hiet.

Vnd do ich nü mein gepet volpracht het, do stuend ich auf vnd wolt in das gewelb gen vnd sehen, was Si täten. Do kam mir der engegen: Ich solt mich wol gehalten, das wër aus komen, vnd heten an der tüer die slos abgefeilt, aber an dem fotrum waren die slos also vest, daz man ir nicht mocht abgefeilen vnd man müst es auf prennen vnd was ein grosser gesmach da von,

daz ich aber in sorgen was, man würd dem gesmachen nach fragen, Do was got aber huettër vor.

Da nü die heylig kron gancz [schuldig] ledig was, da tet wir die tür wider zü vberal vnd sluegen ander slos wider an der slosz stat, die man ab het geprochen vnd trukchten meiner gnedigen frawn Sigel wider auf, vnd die ausser tüer sperrat wir wider zu vnd legaten das tüehel wider mit dem petschaft hin wider an, als wir es heten funden vnd als der purkgraf hin an het gelegt, vnd ich warf die feil in das secret, das in dem frawnczýmer ist, do wirt man die feil Inn vinden, wann man es aufpricht, zu ainem warczaihen.

Vnd die Heiligen kran die trueg man durch die kapellen aus, dar Inn rast sand Elspet, da belaib ich, Helena Quottannerinn ain mesgbant vnd ain Altertuech hin schuldig, das sol mein gnediger [frawn be] herr Kung Lasla bezalen. Do nam mein helfër ainen Ratsamedeinen polster, vnd trennat den auf vnd nam der vederen ainen tail her aws, vnd tet die heilig kran in den polster vnd neyat in wider zü. Da was es nü schier tag, daz dew Junkchfrawn vnd yederman aufstuenden vnd solten nü von dannen farn.

Nu heten die Junkchfrawn ain alte frawn, die bei in dienat, da het meiner frawn gnad nëmleich geschafft, man solt diselbig fraun bezalen vmb iren sold, vnd solt sý da hinden lassen, daz Sy wider haim für gen Ofen. Da nu die fraw bezalt was, do kam die fraw zu mîr, vnd sagt mîr, wie si ain wunderlich ding hiet vor dem ofen gesehen ligen, vnd wessat nicht, was es wër. Da erkam ich hart, vnd verstuend es wol, daz es ettwas was von dem fotrum, darinn die heilig kran gestanden was, vnd redat ir das aus den augen, als ich pest künd, vnd gie fur den ofen haimlich, vnd was ich drümel vand, die warf ich in das feür, daz Sie gar verprünnen, Vnd nam die frawn mit mîr auf die fart. Des nam yeden man wunder, warumb ich das tet. Do sprach ich, das wolt ich vber mich nemen, vnd wolt ir ain phrünt gen Wienn hincz sand Merten erpiten von meiner frawn gnaden, als ich es dann tet.

Da nün die Junkchfrawn vnd das hofgesind bereit waren, daz wir von dannen solten farn, Vnd der do mit mîr was in den sorgen, Der nam den polster, dar Inn dew heilig kran vernët was, vnd enphalch dew seinem dienër, der im geholfen hiet, daz er den polster solt aus dem haws auf den Sliten tragen, dar auf ich vnd er sassen. Da nam der güt gesell den polster auf die achsel vnd ain alte kuehaut dar zue, die het ainen langen swancz, der gie im hinden nach Vnd yder man sach im nach, vnd begunnen sein lachen. Vnd da wir nü aus dem haws her ab in den markcht komen, da hiet wir gern geessen, da vand man nichts anders dann hëring, da ass wir ein wenig, vnd man het das recht Ambt schier gesungen, daz es verr auf den tag was, vnd solten dennoch desselbigen tags von der Plintenpurg gen Gümarn komen, als es dann geschach, vnd es sind doch zwelf meil dahin. Vnd do wir nü farn solten vnd aufsassen, do nam ich eben war, wo das art an dem polster was, do die heilig kran lag, daz ich dar auf nicht sëss. Vnd dankt got dem almöchtigen seinen gnaden, Aber ich sach dennoch oft vmb, ob vns ýmant nach këm, mein sargt die *nam* nicht gar ain ende, vnd het vil gedankchen, vnd ward mich wunder nemen, was got getan het, oder noch tûen wolt.

Wann all die weil ich auf der purg was, slief ich nÿ kain nacht mit rue von der grossen sachen wegen, die mÿr enpholchen was, vnd het vil swërer trawm. Vnd sunder ain nacht trawmbt mÿr wie ain fraw durch gancze maur wër in das gwelb gangen vnd hiet dic heilig kran her aus genomen. Do erkam ich hart vnd stuend pald auf, vnd nam ain Junkchfraun, genant die Dachpekchinn mit mÿr, vnd giengen zu dem gwelb. Da vand ich es, als ich es dann gelassen hat. Do sprach die Dachpekchinn: „Es ist nicht ain wunder, daz ïr nicht wol geslaffen mögt, euch sind gross sach enpholchen.“ Da mit gieng wir wider in vnser rüe. Vnd das bedacht ich alles an der fart.

Vnd do wir komen an die herberg, da wÿr essen wolten, Da nam der güt gesell den polster, dem er enpholchen was, vnd trueg in mit mir an die stat, do wÿr essen wolten, vnd legt in auf ainen tisch gegen mÿr vber, also daz in vnder mein augen was all die weil vnd wÿr assen. Do wir nü geessen heten, do nam der gut gesell den polster vnd legt in wider auf den sliten als vor vnd füeren nü da hin vncz in vincer nacht.

Do kam wir an die Tüenaw, die was dennoch gestössen mit eis, Aber es was an ettlicher stat nü dünn warden. Do wir nü auf das eÿs komen, vnd wol enmitten auf der Tüenaw, da prast der wagen mit Junkchfraÿn ein, vnd viel vmb vnd was ein geschraÿ von den Junkchfraÿn vnd macht ains das ander nicht gesehen. Do erkam ich hart, vnd gedacht, wir müsten mitsambt der heyligen kran in der Tüenaw beleiben. Aber got was vnser helfër, daz kain mensch vnder das eÿs nicht kam, Aber ander ding, das auf dem wagen was, das viel ettleichs in das wasser vnder das eÿs. Do nam ich die HerczogInn aus der Slesÿ vnd die pestenn Junkchfraÿn zu mÿr auf den Sliten, vnd kamen mit der hilff gotes vber das eÿs, vnd auch die andern all.

Vnd da wir nü da hin komen gen Gümarn in das haws, do nam der, der da mit mÿr kam aus den sorgen, den polster mit der heiligen kron vnd trueg in an die stat, da Si wol behalten was, vnd da ich nü in das fraÿn Zÿmer kam zu meiner frawn gnaden, do ward ich schon enphangen von der edeln KungInn, die wessat nü wol, daz ich ain güter pot gewesen was mit der hilf gotes. Aber dÿ wunder vnd die zaichenlich hilf gotes, die sich da vergangen het, der wessat ïr gnad nicht, vnd ist auch also gestorben, daz Si sein nÿ Inn ist worden. Es kund sich nÿ gefuegen, daz ich also lang allain bey ïr gewesen wër, daz ich ir das von dem anfangk vncz an das end hiet mogen gesagen. Wann wir warn nicht lang beÿ enander, vnd kund sich auch nÿ gefuegen, daz ich den gefragt hiet, der mit mir was in den sorgen, ob im icht des gleichen zaichenlich engegent wër, die weil er in dem gwelb was, als mÿr engegent was, wann er kundat nicht vil deütsch, so mocht ich nÿemant getrawn, der mÿr getulmëtscht hiet.

[. . .]

Da sandt meiner fraun gnad gen Ofen vmb ain guldein tuech dem Kung Lassla zu dem gebant, das zu der krönung gehorat, Da was die potschaft zu lang, vnd heten sorg, es wurd sich zu lang vercziehen, Wann die [KungInn] Krönung muest an ainem Hochzeitleichen tag geschehen. Das waren die Phingsten, die nagsten [15. Mai 1440], da was nicht verr hin, daz man eylen müst. Nu was ain schönes vnd gross meszgebant da, das was Kaiser Sigmunds rokch gewesen

vnd was rot vnd guldein, vnd waren silbreynn weiss flekch darIn geworcht, das must man zusneiden vnde machat dem Jungen kung [aln] dar aus sein erstes klaid, das er zu der Heiligen kron solt anlegen. Nü merkcht, ob das icht ain vrkund sei, daz er sein enleichts vnd sein vëterleichts erb pillich solt herschen, die schilt rot vnd weis, vnd ich machat das klain gevert, die alm vnd die vmeral vnd die stol, vnd den hanntfan vnd die hanntschuech vnd die schuech zu den fuessen vnd dy müst ich in der Capellen haymleich machen, mit versperrrter tür.

Da nü alle sach geordent was, Do sandt meiner frawn gnad hern Mathesen, iren Kannczlër, zu irem Vettern, hern Lasslaen ban, daz er zu ir solt kömen, vnd solt mit ir ziehen gen Weissenburg, Si wolt irn Sun lassen krönen, vnd Si hiet die heilig Kron. Da das Her Lasslaban horat, Das geviel im nicht gar wol, Doch het er hofnung, im wër nicht also, Si wër nach auf der Plinten purg, vnd er kam auch nicht zu meiner frawn gnad. Do das ir gnad vernam, daz Her Lasslaban nicht këm, do sandt ir gnad dy zwen, her Matkowan, vnd her Waidavembreich her auf gen Odenburgk. Vnd schuef in ainen Ritter zu, der was des von Zily diener, vnd hies Her Hainreich der Ranndegkër, der solt ir hütten, Wann graf Vlrich von Zily het die weil Odenburg Inne vnd het ainen Hauptman dahin gesaczt, der hies Fridreich Flëdnyczër, dem würden die herren enpholchen.

Da sandt die edel KungInn in grosser gehaym zu dem edelen fursten von Osterrich, genant Herczog Albrecht, vnd tet im zu wissen, Daz Si an dem heiligen Phingstag [15. Mai 1440] wolt lassen krönen meinen gnedigen herren Kung Lassla. Der edel furst Herczog Albrecht erpat sich als ain getrewr freund, der in den nöten wirt erkannt, Vnd hueb sich auf mit eyl vnd zach auch dahin gen Weissenburg, Also daz Si ettleich pherd zu tod riten, vnd kam an dem Phingstag mit sein selbs leib zu seinem Vetteren Kung Lasslaen. Vnd wër sein not beschehen, er hiet sein leben vmb seinen willen lassen auf gen.

Da nü das hofgesind zu einander was, das zu Weissenburg mit meiner fraun gnad ziehen solt, Do sandt ir gnad zu dem Erczbischoue zu Gran, daz er këm vnd zug mit ir gen Weissenburgk vnd half iren Sun zu krönen. Vnd der kam mit ainem güten zeug. Da nü die wiegen was zuegericht, dar Inn man den Jungen Kung solt tragen, Do muesten albeg Vier zu sein, die sein gnad truegen, vnd des phincztags [12. Mai 1440] Vor dem Phingstag nach mittag, Da hueb sich die edel kunginn mit dem Jungen Kung, vnd der edel graf von Zily vnd die grafen von Krabaten Vnd die herczogen von Lÿnndbach vnd kam auch der gross graue her Larenncz vom Haydenreichstüernn in gelaitt zu meiner frawn gnad.

Da ward ain grossew scheffung, genant ain pletten, zuegericht. DarIn gieng die edel KungInn mit irem Kungsklichem [sic!] geslëcht, Sun vnd tochter, vnd vil güter leüt mit in, Daz die pletten gar vol an geladen was, daz Si kaum vmb ain twerche hant ob dem wasser was, daz es sargsam vnd wagleich was. Dar zu kam ain grosser windt, nach half vns got mit freuden hin über.

Do wir hin über komen, do trueg man den Jungen Kung in der wiegen, vnd vier muesten In albeg tragen vnd am meisten geharnascht mannen, Vnd ich, sein DienerInn, rait neben der

wiegen, vnd man trueg in nicht gar verr, da ward er vast waynen vnd wolt in der wiegen nicht beleiben. Vnd ich stuend von dem phërde vnd trueg in an dem armb. Vnd het vast geregent, daz es pös zu geen was. Do was ain fromer Ritter Da, Der hies her Hanns der Pielahër, der weis hait mich durch das gemüs. Vnd do wir zu dem Totans komen, da was es nü vinsternacht, vnd beliben da vber nacht. Smorgens hueb ich mich vor an hin mit dem Jungen Kung, Vnd meiner fraun gnad die pelaib da hinden mit ir Jungsten tochter, Wann ir gnad het zu schaffen mit dem grossen grafen, Der gab ir güte wart, vnd sprach zu iren gnaden, er hiet die graben har mit ernen her bracht, er wolt sy mit ernen in sein grueb auch bringen. Es was aber ain vnderscheid, Vnd er wolt auch mit iren gnaden nicht ziehen gen Weissenburgk vnd kerat vnder wegen wider, Vnd zach da hin gen Ofen vnd warttat, Wann der Kung von Polan këm.

Vnd da ich mit *dem* Jungen Kung vor anhin zach, do kamen wir in ainen schonen Geiaydhof, Der hies zu Dewtsch der Grintsechdel Do het wir ain spöre herberg, wir hieten gern geessen, do vannd wir nichtz gar vil, Wann es was freytag [13. Mai 1440] vnd was güte vasten, vnd beliben da vber nacht. Vnd wartaten, daz meiner fraun gnad auch zu vns kam.

Vnd zugen dahin gen Weissenburgk. Do wir schir hin zu komen, Do rait der von der Freinstat, Waidaniclosch her aus gegen vns, wol mit fünf Hundert phërden. Vnd da wir in das gemüs komen, do hueb der Jung Kung an zu waynen vnd wolt in der wiegen vnd im wagen nicht beleiben. Vnd ich müst sein gnad tragen an dem armb vncz in die Stat gen Weissenburg. Do stuenden die herren von den phërten ab vnd machten ainen weitten kraiss mit geharnaschten mannen vnd hetten plassen swert in den henden vnd enmitten in den kraiss, do muess ich, *elena Kottannerinn* den Jungen Kung tragen, Vnd graf Bartthalome von Krabaten der gieng mir an der ainen seitten Vnd ain annderer an der [se] andern seitten Vnd weisaten mich dem edeln kung zu ernen vnd giengen also durch die Stat vncz inn die herberg. Vnd das was an dem phingstabend [14. Mai 1440].

Da sandt meiner fraun gnad zu den eltisten burgeren, die dann dar zü gehoffen, vnd liess sy die Heiligen kron sehen, vnd hies es zu richten, als es dar zü gehort vnd von alter her komen ist. Vnd warn ettlich burger da, die des gedachten, daz man Kaiser Sigmund auch gekronet het, vnd die da bei gewesen waren.

Des morgens an dem phingstag [15. Mai 1440] do stuend ich frue auf vnd padat den edelen kung vnd richtat in zu, als ich pest mocht. Da trueg man in in die kirchen, Da man dann ainen yeden Kung krönt. Vnd waren vil guter lewtt da, geistlich vnd weltlich, als ir vor gehort hab. Vnd da wir in die kirchen komen, Da trueg man den Jungen Kung zu dem kor. Do was die tüer an dem kor zü geschlossen Vnd die purgër warn innerhalb, vnd meiner fraun gnad, die was ausserthalb der tüer, mit irem sun, dem edlen kung vnd meiner fraun gnad die redat vngrischen mit in, vnd die purgër des gleichen antburten vngrischen iren gnaden her wider aws. Also daz ir gnad swüer an stat irs suns des edelen kungs, Wann an dem selbigen tag, da was sein gnad gleich zwelf wochen alt. Do nü das volbracht ward nach irer alten gewonhait, do teten sy dy tüer auf vnd liessen iren naturleichen herren vnd fraun hin in, vnd auch dy andern, die dar zu geordent worden, geistlich vnd weltlich. Vnd die Jung KungInn, Junkchfraw Elizabeth, die

stuend oben bei der Argel, darumb, daz man ir gnad in dem gedrang nicht laidigen solt, Wann Si was nür in dem vierden Jare.

Da man nü das Ambt wolt anheben, da müst ich den Jungen Kung aufheben, daz man sein gnad fiermat. Nü was der von der Freinstat, Waida niclosch dar zu geordnet, Daz er den Jungen Kung solt Ritter slahen, Darumb daz er ain rechter Lanndsman was. Nü het der edel graf von Zily ain swert, das was [das] beslagen mit silber, vnd verguldet, dar auf was ain Reim gemacht, der hies: „vnvercziegen“, vnd dasselb swert schankcht er dem Jungen Kung, daz man sein gnad damit solt Ritter slahen. Da nam ich *elena Kottannerinn* den Kung an meinen armb. Vnd da nam der von der Freinstat das Swert in die Hant vnd slüeg den Kung zu Ritter, vnd mas Im die sleg wol, daz ich sein wol enphand an dem armb. Das het die edel KungInn gemerkcht, die stuend neben mein, Vnd sprach zu dem von der Freinstat also: „Istemere nem misserten.“ Das haisst zu dewtsch also: „Durch gots willen, tue im nicht [laid] wee.“ Do sprach er also her wider: „Nem“, das haisst, nayn vnd lachat. Da nam der Hoch wierdig prelat, der ErczBischoue von Gran das heylig öl vnd salbat das edel Kungs kind zu Kung. Da legt man Im an das gulden gewant, daz ainem Kung zu gehort. Da nam der ErczBischoue die heilig Kron, vnd saczt die auf das haubt des edelsten Kungs, als es ycz in der heiligen Kristenhait ist: Kung Lassla, Kung Albrechts Sun vnd Kaiser Sigmunds Enykel, Der ist an dem heiligen Phingstag [15. Mai 1440] mit der heiligen Kron von dem ErczBischoue von Gran zu Weissenburg gekrönt worden.

Wann Si habent drew gesez in dem Kungreich zu Vngeren. Vnd wo der ains abgeet, da mainen Sie, daz der nicht rechtlich Kung sey. Das ain gesez ist daz, vnd das haisst, daz ain Kung zu Vngern sol gekrönt werden mit der heilig kron. Das ander, daz in sol krönen der Ercz Bischoue zu Gran. Das dritt, daz die kronung sol beschehen zu Weissenburgk. Die drey gesez die sind volkomenlich gehalten worden zu dem edelen kung Lassla, vnd an dem selben tag, als sein gnad gekronet ist worden, ist er gleich zwelf wochen alt gewesen. Vnd das sult ir freilich wissen, da im der Ercz Bischoue dy heilig kron auf sein haubt saczt vnd im die hielt, daz er das haubt als kreftikleichen auf hielt, es wër ainem kind genüg gewesen ains Jars alt, vnd das wirt selten gesehen von kinden, die zwelf wochen alt sind.

Da nü der edel kung Lassla gekrönet ward an sand Steffans altar an meinem armm, do trug ich den edlen Kung an ainem klainen stieglein auf, ain Höch, als da gewonhait ist. Da las man die ordnung zedel, die dar zü gehort. Da zu ran ain guldein tuech, dar auf ain Kung sol siczen, als da gewonhait ist. Do nam ich ain dekch aus seiner wiegen, die was rot vnd guldein vnd was mit ainem [hämelweissen] hërmlainen vnderczogen, daz dy ordnung volbracht wuerd. Nu merkcht, daz aber dy varb rat vnd weis vnuergebens zu einander kam. Da nu der edel Kung auf dem guldeinen tuech gehalten ward, da hielt im graf Vlrich von Zily die Heilig kron ob dem haupt, vncz das man das Ambt gesang. Der edel Jung Kung der het ain klaine frewd zu seiner krönung, Wann er waynat mit lautter stým, daz man es horat als weit die kirchen was, daz sein das gemain volkch wunder nam, vnd sprachen, es wër nicht ain stým als ain kind bey zwelf [Jaren] wochen, es wër ainem kind genüg, das bey ainem Jar wër, des er doch nicht was. Vnd der von der Freinstat, Wayda Niclos der slüg Ritter an stat des edelen Kung Lasslaes.

Da das Ambt nü volbracht was, do trueg ich den edelen Kung her wider ab vnd legt in In die wiegen, wann er was nü mued worden von dem auf halten. Do trueg man In in sand Peters Kirchen, do müst ich in wider auf heben aus der wiegen vnd müst in tragen zu ainem stuel vnd müst in da nider seczen, als da gewonhait ist, daz ain yeder kung, der da gekronet wirt, da sol nyder siczen. Do trueg ich sein gnad her wider ab vnd legt in wider in die wiegen. Do trueg man den edelen Kung von sand Peters Kirchen, vnd das edel geslècht das volgt als nach zu fuessen vncz in die Herberg. Dann allain der edel graf Vlrich von Zily der rait, Darumb wenn er müst die Heiligen kron fueren vnd halten ob dem haupt des edelen Kungs, Darumb daz es yederman sèch, daz es die Heilig Kron was, die dem heiligen Kung sand Steffan vnd andern Kungen zu Vngerer ist auf gesezt Warden.

[. . .]

Quelle: *Die Denkwürdigkeiten der Helene Kottannerin (1439-1440)*, herausgegeben von Karl Mollay. Wiener Neudrucke: Neuausgaben und Erstdrucke deutscher literarischer Texte, herausgegeben von Herbert Zeman, Band 2. Österreichischer Bundesverlag für Unterricht, Wissenschaft und Kunst: Wien, 1971, S. 14-18, 24-28.